

MH370: Perdana Menteri bentang usul zahir rasa dukacita
Astro Awani
25 Mac 2014

KUALA LUMPUR: Perdana Menteri, Datuk Seri Najib Tun Razak hari ini membentangkan usul mezhahirkan rasa sedih, dukacita dan pilu di Dewan Rakyat terhadap tragedi yang menimpa pesawat MH370.

Perdana Menteri berkata, usul di bawah Peraturan Mesyuarat 27(3) yang turut merakamkan takziah kepada seluruh keluarga, rakan dan kenalan penumpang dan anak kapal pesawat milik Malaysia Airlines (MAS) itu.

"Bahawa dewan ini menyatakan ucapan terima kasih tidak terhingga kepada semua pihak yang terlibat memberikan kerjasama dan bantuan dalam operasi mencari dan menyelamatkan (SAR), khususnya kepada negara-negara luar yang telah banyak memberikan bantuan dalam operasi tersebut.

"Apa yang perlu kita lakukan dalam minggu-minggu dan mungkin bulan-bulan akan datang ini ialah untuk mencari segala serpihan, rangka serta objek-objek yang berkaitan dengan pesawat MH370 supaya boleh kita mengesahkan tanpa ragu-ragu bahawa pesawat itu telah hilang di selatan Lautan Hindi," katanya.

Najib memberitahu dewan, cadangan untuk berkabung dan mengibarkan bendera sepruh tiang merupakan antara cadangan yang diterima kerajaan.

"Kerajaan berpendapat, kita perlu menemui objek dan serpihan itu terlebih dahulu sebelum kita melakukan perkara tersebut," katanya.

Beliau juga memaklumkan Jawatankuasa Fatwa Kebangsaan akan bersidang pada pukul 6 petang ini untuk menentukan bila patut dilakukan solat jenazah ghaib.

Copyright © Astro Awani Network Sdn. Bhd. 2014 (535275-D). All Rights Reserved.

Source: <http://www.astroawani.com/news/show/mh370-perdana-menteri-bentang-usul-zahir-rasa-dukacita-32507?cp>